

Kalata gwa kwanda ugwa Pauli kwa Timoti Isyakulongosya

Timoti aali mwitiki undumyana. Endaga injila nu ntumigwa Pauli ku fynja fingi, antulaga ukulumbilila iNdumi iNunu ijaa Jesu Kilisiti. Piitaasi untumigwa Pauli aalintumile Timoti ukubuka nkukulongosya ikipanga kya Kyala ikya nkaaja akaa mu Efesi.

Pauli aasimbile kalata uju kwa Timoti, isya lubaatiko ulwa mfipanga fya Kyala, ni sya kubasoka nu kubakaanisya abamanyisi baa butungulu nkipanga kya Kyala. Kangi mwa kalata uju, ikulingania uluko ulwa bandu aba bikulondigwa ukusaligwa ukuja balongosi baa fipanga fya Kyala, na muno undongosi ikulondeligwa ukubomba imbombo ni fibugutula ifi filimo nkipanga kya Kyala, bo abatubwa, abakangale na bafwile.

Isi silimo mwa kalata uju
Pauli ikumponia Timoti
Ikansoka isya bamanyisi baa butungulu
Ikulingisania isya lubaatiko ulwa nyiipuuto nu balongosi n
Ikulingisania muno undongosi ikulondeligwa ukubabombel
Ikankasya Timoti mu mbombo jaake

1 Kalata ujū afumile kumyangu une Pauli, ne ntamigwa* gwa Kilisiti Jesu, ku lalagilo lwa Kyala uMpoki gwitū na Kilisiti Jesu ujū jo lusubilo lwitū.

2 Nikukusimbila Timoti gwe mwanangu gwa nalooli ndwitiko. Iliipyana, ulupaakisyo nū lutengaano ukufuma kwa Taata Kyala na kwa Kilisiti Jesu uNtwa gwitū, fijege na nungwe.

Pauli ikundagila Timoti ukūja maaso na bandū aba bikumanyisya isya butungulū

3 Ušyale nkaaja akaa mu Efesi, bo muno naakubūlile bo ngusookako kumyinu ukubūka nkiisu ikya mu Maketonija, ukuti ubakaanisye abandū aba bikumanyisya imanyisyo sya butungulū.

4 Baleke ukūmīlila utusumo utwa ijolo, nū tupango utwa fikolo utū tutikumalika. Isyo sikutwala ulukaani pabūjo bwa lubaatiko lwa Kyala, ulū lukuboneka kumyitū ku njila jaa lwitiko.

5 Inyango jaa lalagilo ulū ko kulonda abiitiki bagananege ni ndumbula inyeelu, nū lwitiko kisita busyobi.

6 Abandū bamo basilekile isyo, basanukiile ukujoba inongwa imbosya miino.

7 Bikulonda ukūja bamanyisi baa ndagilo sya Moose,† nalinga isi bikusijoba nū kūsisisimikisya bakasimanya.

* **1:1 1:1** *Untamigwa* Bala iisya **Abatumigwa** ku isyakulingaania. † **1:7 1:7** **Abamanyisi baa ndagilo sya Moose** Bala ku isyakulingaania.

⁸ Tumeenye ukuti indagilo sya Moose nunu, linga umundu ikusibombela ku bwanalooli.

⁹ Kangi tasyaganiege ukuti indagilo sikabiikigwa kunongwa jaa bagolofu, looli ku basobi, ku basita kukonga indagilo, ku basita kuntiila Kyala, ku batulanongwa, kuli aba bakaja biikemo, ku banyali mu ndumbula, ku bagoga biisabo na bannabo, na ku bagogi baa lako loosa.

¹⁰ Kangi sibiikiigwe ku balogwe, ku banyambala aba bikulogwa na banyambala biinaabo, kuli aba bikuula pamo bikuulisa abandu mbutumwa, ku batungulu, kuli aba bikulapa isya butungulu pabulongi, pamopeene ni singi syosa isi sitikwitikana ni manyisyo sya nalooli.

¹¹ Imanyisyo isyo sikwitikana ni Ndami iNunu ijaa Kyala uNsisya, uju ikugindikigwa. Mbeeliigwe une na Kyala ukujifumunya iNdami iNunu ijo.

Hiipyana lya Jesu Kilisiti kwa Pauli

¹² Nikugwa ulupi kwa Kilisiti Jesu uNtwa gwitw, uju ambeelee amaka, paapo aaliinyiinogoniile ukuja mbombeli ngolofu. Aaliimbikile mu mbombo jaake,

¹³ nalinga kubwandilo naalintukile nu kubataamya abandu baake nu kubafulasya. Aalimbaakiisye paapo naabombaga isyo kisita kusyagania na kisita lwitiko.

¹⁴ Kangi uNtwa gwitw aalimbeelee iliipyana ikulamba, pamopeene nu lwitiko nu lugano ulu luli mwa Kilisiti Jesu.

¹⁵ Ubujobi ubu bwa nalooli, kukuti mundu ikalondigwa ukubwitika, bukuti, "Kilisiti Jesu

aaliisile nkiisu ukubapoka abatulanongwa.” Mbatulanongwa abo, une ndi ntulanongwa ukukinda boosa.

¹⁶ Looli Kyala aalimbaakiisye ukuti Kilisiti Jesu anangisye uboololo bwake boosa na kumyangwa, ne ntulanongwa ukukinda boosa. Aabombile bo ulo ukuti nje gwa kungeetelamo kuli aba bikummwitikaga, bakabe ubuuni bwa bwila na bwila.

¹⁷ Po leelo ubusisya nu lwimiko fijege kumyake amasiku goosa, Malafyale ugwa bwila na bwila, uja atikufwa, kangi atikuboneka, jo Kyala mwene. Amen.

¹⁸ Mwanangu Timoti, nikukulagila ukukongana na masya agaa bukunguluka agaa ijolo, aga gaajobiigwe kunongwa jaako. Ubombelege amasya ago ukujia kilwilo kya kulwila ubwite kanunu.

¹⁹ Gumuilile ulwitiko ni ndumbula inunu. Abandu bamo batikusipilikisya indumbula syabo. Kunongwa ijo baloonangile ulwitiko lwabo.

²⁰ Mmbandwa abo balimo Imenajo na Alikisanda. Abo nundekiile Seetano ukuti bamanyile, balingantukaga Kyala.

2

Imanyisyo isya nyiipuuto

¹ Po ilya kwanda ndi syosa, ngubasuma ukuti, mubapyelekesyege, mubiipuutilege, mubasuumilege nu kubagwila ulupi kwa Kyala abandwa boosa.

² Mukulondigwa ukubasuumila abanyafyale na bangi boosa aba bali mbulongosi, ukuti

tutuugalege nũ lutengaano, pamopeene nũ kũntiila Kyala nũ kũja nũ lwendo ulũnunu.

³ Ili lyo inunu, kangĩ Kyala uMpoke gwitu iikyeliile nalyo.

⁴ Ikułonda abandũ boosa bapokigwe nũ kuti bafikepo pakubũmanya ubwanalooli.

⁵ Paapo Kyala aliko jumojwene, nũ gwa kubafwania abandũ na Kyala ali jumojwene. Ujo jo mundũ Kilisiti Jesu,

⁶ uju aabũningile ubũumi bwake ukuti abaabũle abandũ boosa. Iji jo ndũmi iji aatũpeelee Kyala pakabalilo akabagile.

⁷ Kũnongwa ijo mbiikiigwe ukũja ndũmbilili nũ kũja ntũmigwa, ukubamanyisya abandũ aba bakaja Bajuuta inongwa sya lwitiko nũ bwanalooli. Ngũjoba isya nalooli, ndikutũngũlũpa.

⁸ Popoosa apa mukubũngaana ukwipuuta, ngũlonda abanyambala biinũlege amaboko pakwipuuta, kisita ngalalisi pamo ukũkaanikana.

⁹ Boope abakiikũlũ ngũlonda bafwalege imyenda igya lwimiko. Kũ njila ijo bikũnangisyaga ulwendo ulũnunu. Ndikulonda ukwinokesya kubũlũke bwa nywili, pamo kukufwala utũndũ utwa sahabũ pamo inyambo, pamo kũ myenda igya ntengo unnywamu.

¹⁰ Looli biinokesyege kũ mbombo inunu, bo muno sikũlondeligwa kũ bakiikũlũ aba bikuti bikũntiila Kyala.

¹¹ Abakiikũlũ bajege kimyemye nũ lwijiisyo bo bali pakũmanyila.

¹² Ndikũmmwitikisya unkiikũlũ

ukummanyisya pamo ukuja pabujo bwa kundagila unnyambala, looli ajege kimyemye.

¹³ Paapo Kyala aatalile ukumpela Atamu, alinkukonga Efwa.

¹⁴ Kangi Atamu akaasyobiigwe na Seetano, looli unkiikulu jo uju aasyobiigwe, aalingiile mbutulanongwa.*

¹⁵ Looli unkiikulu ikwambililaga ubupoki ku njila jaa bupaapi,† linga ikuja mu ndwitiko, ndugano, mbwikemo na mbugolofu.

3

Indagilo ku biimilili baa kipanga kya Kyala

¹ Ubujobi ubu bwa nalooli, ubu bukuti, “Umundu uju ikulonda imbombo jaa kuja mwimilili nkipanga kya Kyala, ujo asalile imbombo inunu.”

² Po umwimilili gwa kipanga kya Kyala ajege mundu uju atikujobigwa kabiibi, ajege mwegi gwa nkiikulu jumojuwene, alingasookelaga panja. Iitiimege ndi fyosa, ajege na mahala, ajege gwa kwimikigwa, ajege mwambilila baheesya, amanyege ukumanyisya.

³ Alingajaga ngaala bwalwa pamo ukufulasya abandu, looli ajege mooloolo, alingajwegaga na bandu, alingajaga ni kinyonyo ikibiibi ikya ndalama.

* **2:14 2:14** Bala kalata gwa Ubwandilo 3:1-6. † **2:15 2:15** Ubupoki ku njila jaa bupaapi Akanandi aka, bamo bikuti ko kupaapigwa kwa Kilisiti, ukukongana na muno Kyala aajobiile kwa Efwa. Bala kalata gwa Ubwandilo 3:15-16.

⁴ Ajege mundu gwa kwimilila kanunu inyumba jaake, uju ameenye ukumanyisya abaanaake, bampilikege nu kumpa ulwimiko loosa.

⁵ Linga umundu akabagila ukwimilila inyumba jaake, abagiile buleebule ukwimilila ikipanga kya Kyala?

⁶ Kangi alingajaga mundu uju apindwike mbupiipi, alingiisa kwijumbika nu kulongigwa, bo ulu aalongiigwe Seetano.

⁷ Looli ajege mundu uju bikunnjoba kanunu abandu aba bakaja baa nkipanga kya Kyala, ukuti alingajobigwaga kabiibi nu kukoligwa nu ntego gwa Seetano.

Indagilo ku batuuli baa kipanga kya Kyala

⁸ Kangi abatuuli baa kipanga bajege bandu aba babagiisye ukwimikigwa, balingasyandulaga syandulaga inongwa, balingajaga bagaala bwalwa, balinganyonywaga ukukaba ikyuma ku busyobi.

⁹ Bajege bandu aba bikuumilila ubwanalooli ubwa lwitiko ni ndumbula inyeelu.

¹⁰ Bageligwege taasi. Linga baboniike ukuti babagiisye, babombege imbombo ijaa batuuli nkipanga.

¹¹ Kangi abakasi* baabo babagisyege ukwimikigwa, balingajaga boohesi. Biitiimege nu kusubiligwa ndi syosa.

¹² Untuuli ajege mwegi gwa nkiikulu jumojwene, alingasookelaga panja. Kangi

* **3:11 3:11** Abakasi NKigiliki iisya ilyo libagiile ukaja Abakasi baa batuuli pamo Abatuuli abakiikulu.

abimililege abaanaake ni nyumba jaake kanunu.

¹³ Aba bikubomba imbombo jaa butuuli bwa kipanga kanunu, bikukaba ulwimiko. Bikuja bakifu ndwitiko ulu bali nalo mwa Kilisiti Jesu.

Ubwanalooli bwa lwitiko lwitu

¹⁴ Nikukusimbila amasyu aga, bo ndi nu lusubilo ulwa kwisa kumyako mbupiipi itolo.

¹⁵ Linga ngukaabila, usyaganie isi sikulondigwa ukubombigwa na biitiki. Abo kyo kipanga kya Kyala uMuumi. Ikilundilo ikyo jo mbanda, kangi lwalo lwa nalooli.

¹⁶ Kisita kwilaamwa, isya mbusolofu ndwitiko lwitu ngulamba, syo isi,

Kilisiti aabonekiile mu mbili gwa bandu,

Mbepo ali nkeeti ukuti ngolofu,
aaboniike ku bandumi,

aafumusiigwe mfiisu fyosa,
abandu baa mfiisu fyosa baalimmwitiike,

aalyegiigwe ukubuuka kumwanya
mbusisya.

4

Abamanyisi baa batungulu

¹ Po Mbepo Mwikemo ikujoba pabwelu ukuti, mmasiku gaa kummaliikisyo bamo bikwisa kuleka ukukonga ubwanalooli bwa lwitiko lwitu, bikwisa kukongaga imbepo sya basyobi, ni manyisyo sya mbepo inyali.

² Abandu aba bikumanyisya isyo basyobi, kangi batungulu, indumbula syabo syonangiike, sikufwana syokiigwe ni kyela kya mooto.

³ Abandũ abo bikubakaanisya abanyambala ukwegaga abakiikula. Kangi bikulagila ukuti abandũ balingalyaga ifindũ fimo. Looli Kyala aafipelile ukuti, abiiitiki bafyambililege nũ kũgwa ulupi, paapo babũmeenye ubwanalooli.

⁴ Namanga fyosa ifi apelile Kyala finunu, kangi kakajapo akaa kũkaanigwa, looli fyambililigwege nũ kũgwa ulupi.

⁵ Fyelusiigwe ni isyũ lya Kyala ni nyiipuuto.

Umbombeli ununu ugwa Kilisiti Jesu

⁶ Linga kubamanyisya abiiitiki imanyisyo isi, po kũjaga mbombeli nnunu ugwa Kilisiti Jesu, gwe ukũliile mbwanalooli bwa lwitiko na mu manyisyo inunu, isi ugwe usikongile.

⁷ Utakaanegwe utusumo utwa bakonyofu utwa bakũũũ, tukaja ni fya kukabamo. Gwiji-isibisiyege ukũntiila Kyala.

⁸ Linga kũgũkasya umbili kukabamo fimo, looli ukũntiila Kyala kukaba fyosa, paapo Kyala afingile ukũkũpa ubũũmi bwa nkabalilo aka, nũ bwa nkabalilo aka kikwisa.

⁹ Ubũjubi ubũ bwa nalooli, kukuti mundũ ikũlondigwa ukũbwitika.

¹⁰ Kũnongwa ijo tukwikasya nũ kwijũũũ, paapo tukũnsũũũũũ Kyala uMũũũũũ, uju jo Mpoki gwa bandũ boosa, fiijo abiiitiki.

¹¹ Inongwa isyo ulagilege nũ kũmanyisya.

¹² Ulingiitikaga umundũ gwesa ukũkwilaamwa paapo uli nkeke. Looli abiiitiki bakeetelengemo kũmyako, mbũjubi, nkajũũũũ, ndũgano, ndwitiko na mbwikemo.

13 Gwikasyege ukubabalila abandu Kalata umwikemo, ukulumbilila nu kumanyisya, mpaka paapo ngwisilaga.

14 Ulingalekaga ukubombela ikikungilwa iki Kyala aakupeele ukwendela mmasyu gaa bukunguluka, bo abakuulu baa kipanga bakubiikiilepo amaboko.

15 Gwijwulege ukubomba sisiisyo ni ndumbula jaako joosa, ukuti abandu boosa bakubone muno ujiliile ndi isyo.

16 Gwikeetege ulwendo ni manyisyo syako. Gumilile ukubomba isyo, paapo linga kubomba bo ulo, kuponesya ubumi bwako nu bwa aba bikukupilikisya.

5

Isya bakiikulu abafwile

1 Ulingankemelaga unnyambala unkanigale, looli ummbulege ngati guuso. Abalomyana ubabulege ngati baamyinu,

2 abakiikulu abakangale ngati nyoko, boope abalindwana ubabombelege ku bwikemo, ngati balumbu baako.

3 Ubiimikege abakiikulu abafwile aba bakaja nu butuli nabumo.

4 Looli unkiikulu umfwile uju ali na baana pamo abisukulu, abo bo bikulondigwa ukunkeeta, ukuti bamanyile ukubiimika nu kubatula abakamu baabo. Uko ko kugomola isi boope babombeliigwe na bapaapi baabo. Isyo syo sya kunkyela Kyala.

5 Unkiikulu umfwile uju akaja nu mundu gwa kuntula, ujo ansubiile Kyala, bwila ikwipuuta

na kusuma ubutuuli kwa Kyala pakilo na pamuusi.

⁶ Looli unkiikulu umfwile undufu kuli fyosa, ujo mfwe nalinga ikuboneka muumi.

⁷ Syosa isyo ubalagile abiitiki ukusibomba, ukuti boosa bajobigwege kanunu.

⁸ Linga umundu gwesa atikubatuula abakamu baake, fiijo abaa nnyumba mmyake, ujo alekile ulwitiko, kang'i mbiibi ukunkinda umpanja.

⁹ Unkiikulu umfwile asimbigwege ukuja mfwile gwa kukaba ubutuuli, linga ali ni fyinja 60, kang'i akaasookelaga panja mbwegi bwake.

¹⁰ Ajege mundu uju ikujobigwa kanunu kunongwa jaa mbombo syake, bo ukubaswila abaanaake kanunu, ukubambilila abaheesya, ukubabombela kanunu abiikemo, ukubatuula aba bikuboneligwa, kang'i ukubomba imbombo syosa inunu ni ndumbula jaake joosa.

¹¹ Looli abakiikulu abakeke abafwile, ulingabasimbaga ukuja bafwile baa kukaba ubutuuli, paapo ifnyonyo fya mbili fikubapelaga ukuleka ukumbombela Kilisiti, po bikulondaga ukwegigwa.

¹² Kunongwa ijo bikujaga na bulongi mu ndumbula syabo, paapo balulekile ulufingo lwabo kwa Kilisiti.*

¹³ Pamopeene na isyo, bikukabaga akajiilo akaa boolo bo bikusyunguutila mu nyumba sya bandu. Batikujaga na boolo bwene, kang'i

* **5:12 5:12** *Balulekile ulufingo lwabo kwa Kilisiti* Uluufingo lwabo lwali lwa kusyala kisita kwegigwa kang'i, bo abalame baabo bafwile.

bikujaga nu luhheho nu kupanga inongwa isya bangi isi sitikubatuula nafimo aba bikusijoba.

14 Fyobeene ngulonda abakiikulu abakeke abafwile beegigwege, bapaapege abaana nu kusikeeta inyumba syabo, ukuti balingampapo undugu ubujo bwa kutujoba kabiibi.

15 Namanga abafwile bamo bapaagwike, bikunkonga Seetano.

16 Linga unkiikulu umwitiki ali na bafwile nnyumba jaake, jo abakeetege, ukuti ikipanga kya Kyala kilingajaga mbutolwe. Po kikujaga nu bujo bwa kubatuula abafwile, aba nalooli bakaja nu butuuli.

Isya bakuulu baa kipanga kya Kyala

17 Abakuulu baa kipanga aba bikubomba imbombo kanunu, biimikigwege nu kupeeligwa ifya kubatuula,[†] nnoono aba bikwijuula ukulumbilila nu kumanyisya.

18 Namanga Kalata uMwikemo ikuti, “Ulingajipinyaga ing’ombe ku kanwa, bo jili pakupwula inganu.”[‡] Kangi sisimbiigwe, “Umbomba mbombo abagiisye ukuhombigwa umfwalo gwake.”[§]

19 Ulingajiitikaga inongwa iji ikujobigwa unkuulu gwa kipanga, kisita bukeeti bwa bandu babilu pamo batatu.

[†] **5:17 5:17** Biimikigwege nu kupeeligwa ifya kubatuula NKigiliki bikuti Biimikigwege kabili. [‡] **5:18 5:18** Bala kalata gwa Ukukumbuka Ingomeelesyo 25:4. Ubujobi ubu kokuti *Ing’ombe jibagiile ukulya inganu bo jili pakupwula, ugo go mfwalo gwa mbombo jaake.* [§] **5:18 5:18** Bala kalata gwa Luuka 10:7.

20 Abakuulu baa kipanga aba bikubomba ubutulanongwa, ubakemelege nkyeni mbiitiki, ukuti abangi batiilege.

21 Nikukulagila nkyeni mwa Kyala na mwa Kilisiti Jesu na mbandumi abasunguligwa. Usikole isyo syosa, ulongege kisita kwegamila kuli bamo, ubombege syosa ku bugolofu.

22 Ulingakujaga ukummbiika umundu mu mbombo jaa Ntwa, linga ummbiikile untulanongwa, nungwe kunyalaga kunongwa jaa butulanongwa bwake. Ugwe gwikeetege ubumi bwako, ujege mwikemo.

23 Ulinganwaga amiisi geene, looli unwengepo ifinga* panandi, kunongwa jaa pa lwanda nu bubine ubangi ubu bukukutaamya kabili kabili.

24 Abandu bamo, ubutulanongwa bwabo buli pabwelu, butalilepo ukuboneka nkyeni mwa Kyala. Looli abangi, ubutulanongwa bwabo bukaja pabwelu, bukwisa kuboneka nkyeni mwa Kyala pabulongi.

25 Bo lululo, imbombo inunu sili pabwelu, syope inunu isi sikaja pabwelu sikabagila ukufisigwa.

6

Isya batumwa

1 Abatumwa* abiiitiki boosa babiiimikege fijo abatwa baabo, ukuti ingamu jaa Kyala ni manyisyo syitu silingajobigwaga kabiibi.

* 5:23 5:23 *Ifinga* Bala ku Isyakulingaania.

* 6:1 6:1 Bala

iisya *Untumwa* ku Isyakulingaania.

2 Abatumwa aba abatwa baabo biitiki, balingapepulaga ukubiimika, paapo biitiki biinaabo. Looli bikulondigwa ukubabombela kanunu ukukindapo, paapo abatwa abo boope biitiki baa Kilisiti, kangu bakundwe baake. Isyo umanyisyeye na kubakasya fiijo.

Imanyisyo isya butungulu na bukabi bwa nalooli

3 Linga umundu ikumanyisya imanyisyo sya butungulu, isi sikafwana na masyu agaa nalooli agaa Ntwa gwitu Jesu Kilisiti, kangu sikafwana na bugolofu,

4 ujo iiswile amatingo, kangu akamanya nasimo. Ali ni kigili ikya lukaani ulwa masyu amanandi, ulu lukutwala ubufi, ubwite, amaheelu, ukwilaamwa

5 na kumana bwilabwila. Abandu aba bikubomba bo ulu, boonangiike amahala, babulekile ubwanalooli, bikwinogona ukuti ukubomba imbombo jaa Kyala jo njila jaa kukabila ikyuma.

6 Ukuntiila Kyala na kufwana na ifi uli nafyo, ko kukaba ifinywamu.

7 Paapo tukaaliisile nafyo nafimo nkiisu, kangu tatikusookamo nafyo nafimo.

8 Looli linga tuli ni fya kulya ni myenda, tufwanege nafyo.

9 Abandu aba bali ni kinyonyo ikya kyuma, bikugwila mu ngelo na mmitego. Bali ni finyonyo fingi ifya bukonyofu, ifi fikubasopa ndoongiko na mbupyutigwa.

10 Paapo ukusigana indalama go nsi gwa mbi-ibi nyingi. Bamo aba bikanyonywa indalama,

basyobiigwe, balulekile ulwitiko, biifuleesye mu ndumbula ku basulumanie ubwingi.

Isya kumaliikisya

¹¹ Looli ugwe mundu gwa Kyala, usibope isyo. Ukonge ubugolofu, ulutiilo kwa Kyala, ulwitiko, ulugano, ukwikasya na booloolo.

¹² Gwikasyege ukubomba isi sikukongana na lwitiko lwako. Ubukole ubuumi bwa bwila na bwila, ubu aakukooleliile Kyala bo gwitiike ulwitiko nkyeni mbakeeti abingi.

¹³ Nikukulagila nkyeni mwa Kyala ujū ikutupa ubuumi utundu toosa, na nkyeni mwa Kilisiti Jesu, ujū aajobile ubakeeti bwa nalooli nkyeni mwa Pontio Pilati.†

¹⁴ Ukolege ululagilo ulo kisita kusoba napamo, kisita kujobigwa kabiibi, mpaka apa bo ikwisa kangi uNtwa gwitu Jesu Kilisiti.

¹⁵ Ukwisa kwake aakukuja pakabalilo aka akabaatiike Kyala, ujū ikutuufigwa, mwene jo Ndagili, Malafyale gwa banyafyale, Ntwa gwa batwa.

¹⁶ Ujo jo mwene atikufwa, atugeele ndumuli ulu kakabagila nakamo ukusegelela. Kangi akajako umundu ujū ammbwenemo, pamo ujū abagiile ukummbona. Ulwimiko na maka ali nafyo amasiku goosa. Ameni.

¹⁷ Ubabwile abakabi baleke ukwijumbika, pamo ukusubila ikyuma ikya pakiisu, ikya kabalilo akapimba. Looli bansubilege Kyala ujū ikutupapo fyosa ku bwingi, ukuti fituhobosyege.

† 6:13 6:13 Bala kalata gwa Maalika 15:2.

¹⁸ Ubalagile ukuti babombege inunu, bajege bakabi baa mbombo inunu, kangi bajege bape. Bajege bandu baa kulya icyuma kyabo na bangi.

¹⁹ Ukubomba inunu, bikwibungaanikisya icyuma kumwanya, lo lwalo lwa kwisa kukabila ubuho ubwa nalooli.

²⁰ Timoti, ubulindilile ubwanalooli ubu Kyala akupeele. Gwepukege ukujoba na bandu inongwa isi sitikumwimika Kyala, na kukaanikana isya bakonyofu, isi bamo bikuti bo bumanyili.

²¹ Kunongwa ijaa bumanyili ubo, bamo balulekile ulwitiko.

Iliipyana lijege pamopeene na nuumwe.

Ulwikano Ulupya
Nyakyusa-Ngonde: Ulwikano Ulupya (New
Testament+)

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

14ff4521-53e4-562c-aacb-6f4faf55a6c8